



醫
 辨證錄

三

中武
 186
 3



武庫
186
3

問氏
杏庭

同書

辨證錄卷之三

咽喉痛門

人有感冒風寒、一時咽喉腫痛、其勢甚急、變成雙蛾者、其症痰涎稠濁、口渴呼飲、疼痛難當、甚則勺水不能入喉、此陽火壅阻於咽喉、視其勢若重、而病實輕也、夫陽火者、太陽之火也、太陽之火、即膀胱之火也、與腎經之火為表裏、膀胱火動、而腎經少陰之火、即來相助、故直冲於咽喉之間、而肺脾胃三經之火、亦復相隨而上升、於是借三經之痰涎、盡阻塞於咽喉、結成火毒、而不可解、治法似宜連數經治矣、然而其本實始於太陽泄膀胱之火、而諸經之火自安矣、但咽喉之地、近於肺、太陽既假道於

清 山陰 陳士鐸敬之甫著

大日本 長崎 淺井俊元民甫校

松井家藏

中興書局

咽喉

長安亭藏

肺經而肺經險要之地，即狹路之戰場也。安有舍戰場要地，不解其圍而先搗其本國者乎？所貴有兼治之法也。方用破隘湯，桔梗三錢，甘草二錢，柴胡一錢，白芍五錢，玄參三錢，麻黃一錢，天花粉三錢，山豆根一錢，水煎服。一劑而咽喉寬，再劑而雙蛾盡消矣。方中散膀胱之邪者，居其二；散各經之邪，居其五。尤加意於散經之邪者，由近以散遠也。

此症用散蛾湯亦神效

射于枳殼蘇葉當歸各一錢，甘草二錢，桔梗三錢，天花粉三錢，山豆根八分，麻黃五分，水煎服。一劑即愈。

人有一時喉忽腫大，而作痛吐痰如湧，口渴求水，下喉少快，已而又熱，呼水，咽喉長成雙蛾，既大且赤，其形宛如雞冠。此喉痺之症，即俗稱為纏喉風也。乃陰陽二火並熾，一乃少陽之相火，一乃少陰之君火也。二火齊發，其勢更暴。咽喉之管細小，火不得

遽泄，遂遏抑於其間，初作腫而後成蛾也。蛾有二，一雙蛾，一單蛾也。雙蛾生兩毒，兩相壅擠，中間反留一線之隙，可通茶水藥劑，尚可下嚥。若單蛾，則獨自成形，反塞住水穀之路，往往有勺水不能嚥者。藥物既不可嚥，又從何路以進藥食哉？法宜先用刺法，一則刺少商等穴，尚欠切近，用刀直刺其喉腫之處，一分，則喉腫必少消，可用吹藥以開之。吹藥方，膽礬一分，牛黃一分，皂角燒灰末一分，麝香三釐，冰片一分，為絕細末，和勻吹入喉中，必大吐痰而愈。然後用煎劑，方名救喉湯，射干一錢，山豆根二錢，玄參一兩，麥冬五錢，甘草一錢，天花粉三錢，水煎服。一劑而全愈也。若雙蛾，不必用刺法，竟用此方。玄參為君，實足以瀉心腎君相之火，况佐之豆根射干天花粉之屬，以祛邪而消痰，則火自歸經，而咽喉之間，關門肅清矣。

此症用兩地湯
加減亦神

熟地生地各一兩肉桂三分黃連天
花粉各三錢水煎服下喉即愈不必二劑

人有咽喉腫痛日輕夜重喉間亦長成蛾宛如陽症但不甚痛而
咽喉之際自覺一線乾燥之至飲水嚥之少快至水入腹而腹
又不安吐涎如水甚多將涎投入清水中即時散化為水人以
為此喉痛而生蛾也亦用瀉火之藥不特杳無一驗且反增其
重亦有勺水不能下嚥者蓋此症為陰蛾也陰蛾則日輕而夜
重若陽蛾則日重而夜輕矣斯少陰腎火下無可藏之地直奔
而上炎於咽喉也治法宜大補腎水而加入補火之味以引火
歸藏方用引火湯熟地三兩巴戟天一兩茯苓五錢麥冬一兩
北五味二錢水煎服一劑而火自下歸咽喉之腫痛全消二劑
即全愈方用熟地為君大補其腎水麥冬五味為佐重滋其肺

金、金水相資子母原有滂沱之樂水旺足以制火矣又加入巴
戟之溫則水火既濟水趨下而火已有不得不隨之勢更增之
茯苓之前導則水火同趨而共安於腎宮不啻有琴瑟之和諧
矣何必用桂附大熱之藥以引火歸源乎夫桂附為引火歸源
之聖藥胡為棄而不用不知此等之病因水之不足而火乃沸
騰今補水而仍用大熱之藥雖曰引火於一時畢竟耗水於日
後予所以不用桂附而用巴戟天取其能引火而又能補水則
腎中無乾燥之虞而咽喉有清肅之益此巴戟天所以勝桂附
也

此症用收火
湯亦神效

熟地三兩山茱萸一兩茯苓五錢肉
桂三錢水煎一碗探冷服一劑即消

人有咽喉乾燥久而疼痛人以為肺熱之故誰知是腎水之涸竭

乎夫肺金生腎水者也肺氣清肅自能下生腎水惟肺氣既虛則肺中津液僅可自養而無如腎水大耗日來取給則剝膚之痛烏能免乎譬如父母未有不養贍其子者而處困窮窘迫之時則無米之炊何能止索飯啼饑之哭倘其子成立自能顧家為父母者不特可以取資而亦可免迫索之苦乃其子又伶仃狼狽不善謀生則子貧而父母更貧其乾枯之狀有不可形容者矣肺腎何獨不然故欲救肺之乾燥必先救腎之枯涸也方用于母兩富湯治之熟地三兩麥冬三兩水煎服一劑而燥少止三劑而痛少止十劑而燥與痛盡去也熟地滋腎救肺子之枯也麥冬滋肺救腎母之涸也上下兩治腎水有潤澤之歡則肺金自無焦焚之迫猶人子無憔悴之色則父母自有安享之愉此肺腎之必須兼治而熟地麥冬所以並用而能出奇也

此症用金水

湯亦佳

熟地山茱萸各一兩天門冬地骨皮丹皮各三錢沙參五錢水煎服

人有生喉癬於咽門之間以致喉嚨疼痛者其症必先作癢面紅耳熱而不可忍其後則嚙唾之時時覺乾燥必再加嚙唾而後快久則成形而作痛變為楊梅之紅凜或痛或癢而為癬矣夫癬必有蟲咽喉之地豈容生蟲世人往往得此病恬不為意到不能治而追悔於失治也不其晚乎此病因腎水之耗以致腎火之冲而肺金又燥清肅之令不行水火無既濟之歡金火有相形之勢兩相戰鬪於關隘之間致成此症治法仍須補腎中之水而益其肺氣以大滋其化源兼用殺蟲之味以治其癬庶幾正固而邪散而蟲亦可以盡掃也方用化癬神丹玄參一兩麥冬一兩五味子一錢白薇一錢鼠黏子一錢百部三錢甘草

一錢紫苑二錢白芥子二錢水煎服二劑而疼痛少痊又服四劑而癰中之蟲盡死矣即不可仍用此方另用潤喉湯熟地一兩山茱萸四錢麥冬一兩生地三錢桑白皮三錢甘草一錢貝母一錢薏仁五錢水煎服連服十劑而癢與痛俱除矣方中再加肉桂一錢饑服冷服實為善後之策又萬舉而萬全也蓋從前多用微寒之藥恐致脾胃受傷加入肉桂以補火則水得火而無冰凍之憂土得火而有生發之樂下焦熱而上焦自寒也

此症先可用白微湯十劑後可用微喉湯三十劑亦能奏功

白微湯

白微二錢麥冬三錢款冬花桔梗各三分百部二分貝母五分生地三錢甘草三分水煎湯漱口服日服一劑服十日蟲死

微喉湯

熟地二兩麥冬一兩甘草一錢白微五分水煎服服一月全愈

人有生長膏粱素耽飲酒勞心過度致咽喉臭痛人以為肺氣之傷誰知是心火太盛移熱於肺乎夫飲酒傷胃胃氣薰蒸宜乎肺氣之熱矣然而胃火薰肺而胃土實生肺也故飲酒尚不傷肺惟勞心過度則火起於心而肺乃受刑矣况胃火助之則火性炎上而咽喉乃成燔燒之路自然唾涕稠粘口舌乾燥氣腥而臭而痛症乃成矣蓋心主五臭入肺而腥臭又何疑乎方用解腥丹甘草二錢桔梗二錢麥冬五錢桑白皮三錢枯苓一錢天門冬三錢生地三錢貝母五分丹皮三錢水煎服連服二劑而痛止再服四劑而臭除此方治肺而兼治心治心而兼治胃者也因膏粱之人其心肺之氣血原虛不滋益二經之氣血而但瀉其火則胃中之氣血必傷反增其火熱之焰矣今補肺以涼肺補心以涼心補胃以清胃而火自退舍不止咽喉之痛而

痛自定也。

此症用息炎

湯亦可

黃連甘草黃芩各一錢麥冬五錢天冬生地玄參各三錢紫苑天花粉石膏各二錢竹葉三十片陳皮三分水煎服四劑愈

人有咽喉腫痛食不得下身發寒熱頭疼且重大便不通人以為熱也誰知是感寒而成之者乎然而人不敢信為寒也論理用逍遙散散其寒邪而咽喉之痛即解雖然人不敢信為寒以用祛寒之藥獨不可外治以辨其寒乎法用水通一兩葱十條煎湯浴於火室中如是熱病身必有汗而咽喉之痛不減也倘是感寒雖湯火大熱淋洗甚久斷然無汗乃進逍遙散必然得汗而咽喉之痛立除此法辨寒熱最確不特拘之以治感寒之喉痛也

此症用紫白

飲亦妙

紫蘇茯苓各三錢半夏一錢陳皮五分甘草一錢白朮二錢水煎服一劑即愈

牙齒痛門

人有牙齒痛甚不可忍涕淚俱出者此乃臟腑之火旺上行於牙齒而作痛也治法不瀉其火則不能取效然火實不同有虛火有實火大約虛火動於臟實火起於腑而實火之中有心包之火有胃火虛火之中有肝火有脾火有肺火有腎火同一齒痛何以別之不知各經在齒牙之間各有部位也兩門牙上下四齒同屬心包也門牙旁上下四齒屬肝也再上下四牙乃胃也再上下四牙乃脾也再上下四牙乃肺也再上下之牙乃腎也大牙亦屬腎腎經有三牙齒多者貴治病不論多寡總以前數分治之多驗火既有如許之多而治火之法宜分經以治之矣雖然吾實有統治火之法方用治牙仙丹玄參一兩生地一兩水煎服無論諸火服之均效察其爲心包之火加黃連五分察

其為肝經之火加炒梔子二錢察其為胃經之火加石膏五錢
 察其為脾經之火加知母一錢察其為肺經之火加黃芩一錢
 察其為腎經之火加熟地一兩飲一劑而火輕再劑而火散四
 劑而平復如故矣夫火既有虛實不同何以一方而均治不知
 火之有餘無非水之不足也我滋其陰則陰陽之火無不相戢
 矣况玄參尤能瀉浮遊之火生地亦能止無根之焰二味又瀉
 中有補故虛實咸宜實治法之巧而得其要者也况又能辨各
 經之火而加入各經之藥有不取效如神乎或曰火生於風牙
 齒之疼未有不兼風者治火而不治風恐非妙法不知火旺則
 生風未聞風大而生火人身苟感風邪則身必發熱斷無風止
 人牙而獨痛之理况火病而用風藥反增其火熱之勢是止痛
 而愈添其痛矣或疑膀胱有火肝經有火心經有火大小腸三

焦俱有火何俱遺之而不言不知臟病則腑亦病腑病則臟亦
 病治臟不必治腑瀉腑不必又瀉臟况膀胱心與三焦大小腸
 俱不入於齒牙故畧而不談也

此在外治亦可
用畢芫湯

畢撥芫花各二錢水一
碗煎半盞漱口即止痛

內治用沙豆
湯亦妙

沙參一兩荆芥丹皮各三錢山
豆根一錢水煎服二劑即愈

人有多食肥甘齒牙破損而作痛如行來行去者乃虫痛也夫齒
 乃骨之餘其中最堅何能藏虫乎不知過食肥甘則熱氣在胃
 胃火日冲於口齒之間而濕氣乘之濕熱相搏而不散乃虫生
 於牙矣初則止生一二虫久則蕃衍而多於是蝕損其齒遂致
 墮落一齒既朽又蝕餘齒往往有終身之苦者此等之痛必須

外治若用內治之藥未必殺虫而臟腑先受傷矣方用五靈至聖散五靈脂三錢研絕細末白微三錢細辛五分骨碎補五分各研為細末先用滾水含漱齒至淨然後用前藥末五分滾水調如稀糊含漱齒半日至氣急吐出如是者三次痛止而虫亦死矣斷不再發蓋齒痛原因虫也五靈脂白微最殺虫於無形加入細辛以散火骨碎補以透骨引五靈脂白微直進於骨內則虫無可藏盡行勦殺虫死而痛自止也

此症用破顏丹亦可外治甚效

丹砂三分麝香半分米片一分雄黃一錢為細末將末搽於痛處口吐涎而痛立止

內治亦可用

安寧飲
玄參生地麥冬各五錢白微一錢骨碎補五錢天門冬三錢水煎服三劑亦愈

人有牙痛日久上下牙牀盡腐爛者至飲食不能用日夜呼號此

乃胃火獨盛有升無降之故也人身之火惟胃最烈火既升於齒牙而齒牙非藏火之地於是焚燒於兩頰而牙床紅腫久則腐爛矣似乎亦可用治牙仙丹加石膏以治之然而其火蘊結可用前方以消弭於無形今既已潰破腐爛則前方又不可用以其有形難於補救也方用竹葉石膏湯加減石膏五錢知母二錢半夏二錢茯苓三錢麥冬三錢竹葉二百片葛根三錢青蒿五錢水煎服連服四劑而火退腫消矣然後再用治牙仙丹以收功也石膏湯以瀉胃火用之足矣何加入葛根青蒿也不逐其火而葛根青蒿尤能退胃中之陰火所以同用之以出奇陰陽之火盡散齒牙之痛頓除何腐爛之不漸消哉

此症可用石母降炎湯

石膏茯苓荆芥炒黑各三錢知母一錢麥冬一兩玄參兩甘草一錢升麻五分天花粉三錢水煎服四劑全愈

人有牙齒疼痛至夜而甚呻吟不臥者此腎火上冲之故也然腎火乃虛火非實火也若作火盛治之多不能勝即作虛火治之亦時而效時而不效蓋火盛當作火衰有餘當認作不足乃下虛寒而上現假熱也人身腎中不寒則龍雷之火下安於腎宮惟其下寒之甚而水又無多於是上冲於咽喉而齒牙受之正如龍雷之火至冬則地下温煖而龍雷皆蟄春氣發動則地底寒冷而不可蟄乃隨陽氣上升矣至於夜分尤腎水主事水不能養火而火自遊行於外仍至齒而作祟譬如家寒難以棲處必居子舍而作威而子又貧乏自然觸動其怒氣矣治法急大補其腎中之水而益以補火之味引火歸源則火有水以養之自然快樂而不至於上越矣方用八味地黃湯加骨碎補治之

一劑而痛止再劑而痛不發也蓋六味地黃湯補其腎水桂附引火以歸於命門但補水引火之藥不先入齒中則痛之根不能除所以必用骨碎補以透入齒骨之中而後直達於命門之內此拔本塞源之妙法耳

此症亦可用制火湯

熟地二兩生地一兩玄參五錢肉桂三分骨碎補一錢車前子二錢水煎服二劑即止痛

人有上下齒牙疼痛難忍閉口少輕開口更重人以為陽明之胃火也誰知是風閉於陽明太陽二經之間乎此病得之飲酒之後開口向風而臥風入於齒牙之中留而不出初小疼而後大痛也論理去其風宜愈而風藥必耗人元氣因虛以入風又耗其氣則氣愈虛風邪即欺正氣之怯而不肯出疼終難止也古人有用灸法甚神灸其肩尖微近骨後縫中小舉臂取之當骨

解陷中灸五壯即差但灸後項必大痛良久乃定而齒疼永不發也然而人往往有畏灸者可用散風定痛湯治之白芷三分石膏二錢升麻三分梧桐淚一錢當歸三錢生地五錢麥冬五錢乾葛一錢天花粉二錢細辛一錢水煎服一劑輕一劑即愈不必三劑也此方補藥重於風藥正以風得補而易散也

此症可用宜揚散

柴胡五分白芍五錢甘草白芷乾葛細辛各一錢青蒿三錢天花粉三錢石膏二錢水煎服二劑愈

人有上下齒痛甚口吸涼風則暫止閉口則復作人以為陽明之火盛也誰知是濕熱壅於上下之齒而不散乎夫濕在下易散而濕在上難祛蓋治濕不外利小便也水濕下行其勢順水濕上散其勢逆且濕從下受易於行濕從上感難於散故濕熱感於齒牙之間散之尤難以飲食之水皆從口入必經齒牙不已

濕而重濕乎濕重不散而火且更重矣所以經年累月而痛不能止也治法必須上祛其濕熱又不可單利小便當佐之以風藥則濕得風而燥熱得風而涼濕熱一解而齒痛自愈矣方用上下兩疏湯茯苓五錢白朮三錢澤瀉二錢薏仁五錢防風五分白芷三分升麻三分荆芥二錢梧桐淚五分甘草一錢水煎服四劑而濕熱盡解而風亦盡散也蓋茯苓白朮澤瀉薏仁原是上下分水之神藥又得防風白芷升麻荆芥風藥以祛風夫風能散濕兼能散火風火既散則濕邪無黨安能獨留於牙齒之間耶仍恐邪難竟去故加入甘草梧桐淚引入齒縫之中使濕無些須之留又何痛之不止耶况甘草緩以和之自不至相襍而相犯也

口舌門

有婦人產子舌出不能收人以為舌脹也誰知是難產心驚之故乎夫舌乃心之苗心氣安而舌安心氣病而舌病產子而胞胎已破子不能產欲顧子而母命恐亡欲全母而子命難保其心中驚恐自必異於常時心氣既動心火必不寧矣胎胞之系原通於心用力產子而心為之懼故子下而舌亦出也舌出不收心氣過升之故治法必須降氣為主古人有以恐勝之者然舌出由於心驚復因驚以增其恐吾恐愈傷心氣矣雖舌驟收未必不隨收而隨出也故降氣必須補心而不可增其恐方用助氣鎮心丹人參三錢茯神二錢菖蒲五分硃砂一錢不可火製五味子一錢水煎含漱久之然後嚥下一劑即收二劑全愈此方用硃砂以鎮心又得人參以生氣氣旺則火自歸心火歸而

焰息舌亦隨焰而自收矣何必增其恐懼而氣始下哉

此症亦可用
欬舌神丹

人參一兩五味子一錢麥冬二錢附子一片
菖蒲良薑各三分水煎含漱嚥下一劑即收

人有舌下牽強手大指次指不仁兩臂麻木或大便閉結或皮膚赤暈人以為風熱之病也誰知是惱怒所致因鬱而成者乎夫舌本屬陽明胃經之土而大腸之脈散居舌下舌下牽強是陽明胃與大腸之病也然非無因而至因肝氣不伸木尅胃土則土虛而不能化食遂失養於臂指經絡之間而麻木不仁之症生臂指經絡失養何能外潤於皮膚乎此赤暈之所以起也胃土受肝木之尅則胃氣大燥無血以資大腸因熱以生風腸中秘結益失其傳導之職矣治法必須通大腸而健胃又必平肝以補血方用八珍湯加減治之人參一錢當歸五錢白芍五錢

柴胡一錢陳皮五分甘草一錢槐角一錢白朮一錢熟地五錢
半夏五分茯苓一錢水煎服二劑輕四劑又輕十劑全愈八珍
湯補氣補血之方也加入柴胡以舒肝增入槐角以清火肝之
鬱解而胃之氣自旺胃氣旺而轉輸自暢矣

此症用頤養
湯亦妙

當歸一兩香附茯神丹皮玄參各三錢栝子仁沙參黃芩
各二錢遠志五分麥冬五錢甘草一錢水煎服四劑愈

辨諸錄
 卷之三
 三
 辨諸錄

鼻淵門

人有無端鼻流清水者久則流涕又久則流黃濁之物如膿如髓
 腥臭不堪聞者流至十年而人死矣此病得之飲酒太過臨風
 而臥風入膽中膽之酒毒不能外泄遂移其熱於腦中夫腦之
 竅通於鼻而膽之氣何以通於腦而酒之氣何以入於膽耶凡
 善飲酒者膽氣自旺且多呌號故酒先入膽而膽不勝酒即不
 及化酒而火毒存於其中矣夫膽屬木最惡者寒風也外寒相
 侵則內熱愈甚膽屬陽而頭亦屬陽膽移熱而上走於頭腦在
 頭之中頭無可藏熱之處故遇穴而即入况膽與腦原是相通
 腦之穴大過於膽遂樂於相安居之而不肯還入於膽矣迨居
 腦既久而動極思遷又尋竅而出乃順趨於鼻矣火毒淺而涕
 清火毒深而涕濁愈久愈流而愈重後則涕無可流併腦髓而

盡出欲不死而不可得矣。治法治其腦可也。然治其腦必仍治其膽者，探源之治也。方用取淵湯，辛夷二錢，當歸二兩，柴胡一錢，炒，梔子三錢，玄參一兩，貝母一錢，水煎服。一劑涕減，再劑涕又減，三劑病全愈。蓋辛夷最能入膽，引當歸以補腦之氣，引玄參以解腦之火，加柴胡梔子以舒膽中之鬱熱，則膽不來助火，而自受補氣之益也。然不去止鼻中之涕者，清腦中之火，益腦中之氣，正所以止之也。蓋鼻中原無涕，遏抑上游出涕之源，何必截下流之水乎。此治法之神耳。或疑當歸過於多用，不知腦髓盡出，不大補則腦之氣不生，辛夷耗散之物，非可常用也。故乘其引導，大用當歸以補腦添精，不必日後之再用。倘後日減去辛夷，即重用當歸無益矣。此用藥先後之機，又不可不識也。人疑當歸之不可多用者，不過嫌其性滑，有妨於脾耳。誰知腦

髓直流之人，必髓不能化精者也。精不能化，則精必少。精少則不能分布於大腸，必有乾燥之苦。然則用當歸以潤之，正其所喜，何慮之有。

此症用探淵丹，亦能奏功。

辛夷一錢，當歸五錢，麥冬二兩，茯苓三錢，黃芩二錢，白芍一兩，天花粉三錢，生地五錢，桔梗二錢，水煎服，四劑全愈。

人有鼻流清涕，經年不愈，是肺氣虛寒，非腦漏也。夫腦漏即鼻淵也。原有寒熱二症，不止膽熱而成之也。然同是鼻淵，而寒熱何以分乎。蓋涕臭者熱也，涕清而不臭者寒也。熱屬實熱，寒屬虛寒。茲但流清涕，而不腥臭，正虛寒之病也。熱症宜用清涼之藥，寒症宜用溫和之劑。倘槩用散，而不用補，則損傷肺氣，而肺金益寒，愈流清涕矣。方用溫肺止流丹，呵子一錢，甘草一錢，桔梗三錢，石首魚腦骨五錢，煨過，存性為末，荆芥五分，細辛五分，人

參五分水煎調服一劑即止流矣不必再服也此方氣味溫和自能煖肺而性又帶散更能祛邪故奏功如神或謂石首腦骨古人以治內熱之鼻淵是為寒物何用之以治寒症之鼻淵耶不知鼻淵實有寒熱二症而石首腦骨寒熱二症皆能治之但熱症之涕通於腦寒症之涕出於肺我用羣藥皆入肺之藥也無非溫和之味肺既寒涼得溫和而自解復得石首腦骨佐之以截腦中之路則腦氣不下陷而肺氣更閉矣所以一劑而止流也

人有鼻塞不通濁涕稠黏已經數年皆以為鼻淵而火結於腦也誰知是肺經鬱火不宜有似於鼻淵而非鼻淵乎夫鬱病五臟皆有不獨肝木一經之能鬱也內經曰諸氣臏鬱皆屬於肺肺氣鬱則氣不通而鼻乃肺經之門戶故肺氣不通而鼻之氣亦

不通也難經曰肺熱甚則出涕肺本清虛之府最惡者熱也肺熱則肺氣必粗而肺中之液必上沸而結為涕熱甚則涕黃熱極則涕濁敗濁之物豈容於清虛之府自必從鼻之門戶而出矣方用逍遙散加味治之柴胡二錢當歸三錢白朮二錢陳皮五分甘草一錢黃芩一錢茯苓二錢白芍三錢白芷一錢桔梗三錢半夏一錢水煎服一劑輕二劑又輕連服八劑全愈此方治肝木之鬱者也何以治肺鬱而亦效不知道逍遙散善治五鬱非獨治肝經一部之鬱已也况佐之桔梗散肺之邪加之黃芩瀉肺之熱且引羣藥直入肺經何鬱之不宣乎故壅塞通稠濁化也

此症用宣肺散亦佳

柴胡黃芩紫苑各二錢白芍一兩當歸麥冬各五錢茯苓荆芥子各三錢甘草款冬花各一錢紫蘇一錢辛夷五分水煎

服四劑愈

耳痛門 附耳聾

人有雙耳忽然腫痛內流清水久則變為膿血者身發寒熱耳內如沸湯之響或如蟬鳴此少陽膽氣不舒而風邪乘之火不得散故生此病法宜舒發膽氣而佐之祛風瀉火之藥則愈矣然有治之而不效者何也蓋膽受風火之邪燥乾膽汁徒用祛風瀉火之湯則膽汁愈乾膽火益熾火借風威愈肆焚燒而耳病轉甚矣方用潤膽湯白芍一兩當歸一兩柴胡一錢炒梔子二錢玄參一兩天花粉三錢菖蒲八分水煎服一劑而痛輕二劑而腫消三劑而膿血止四劑而寒熱盡除十劑而全痊也歸芍不特入膽而且入肝也膽病肝必病平肝則膽亦平也柴胡梔子亦是舒肝之藥舒肝正所以舒膽肝血自旺而膽汁有不濡潤者乎邪風邪火已有不治自散之機乃加天花粉之逐痰則

風火無黨用菖蒲通耳中之竅引玄參以退浮遊之焰自然風火漸祛上焦清涼而耳病隨愈也

此症用止鳴丹亦效

白芍五錢柴胡二錢炒梔子三錢生地三錢麥冬三錢菖蒲五分茯苓三錢半夏五分水煎服數劑即愈

人有耳中如針之觸而生痛者並無水生止有聲沸皆云火邪作祟不知乃腎水之耗也夫腎開竅於耳腎氣不足則耳閉然耳閉之前必痛而後閉何也蓋腎火冲之也火冲而不得出則火之路塞而不通於是火不再走於耳而成聾矣但火既上冲於耳而火之路何以致塞蓋火邪上冲耳竅之內如有物塞之狀故此等之病必須速治否則成聾而難治矣方用益水平火湯熟地一兩生地一兩麥冬一兩玄參一兩菖蒲一錢水煎服一劑而痛止二劑而響息三劑而全愈而耳不再聾也四味乃補

水之藥又能於水中瀉火且不損傷腎氣則腎火自降菖蒲引腎氣而上通火得路而上達又何有阻抑之虞乎此等之病老人最多老人耳聾雖高壽之徵似可不必施治不知已成之聾不必治未成之聾正不可不治也此方治已聾者尚有奇功矧治未聾之耳有不取效者哉

此症亦可用息沸湯

熟地二兩山茱萸一兩麥冬五錢北五味十粒菖蒲一錢遠志五分丹參三錢水煎服十劑愈

人有耳痛之後雖愈而耳鳴如故者人以爲風火猶在耳也仍用祛風散火之藥而鳴且更甚然以手按其耳則其鳴少息此乃陽虛而氣閉也法宜補陽氣爲主而兼理其肝腎之虛方用發陽通陰湯治之人參二錢茯苓三錢白朮二錢黃芪三錢肉桂五分熟地五錢當歸二錢白芍三錢柴胡一錢甘草五分白芥

子二錢、荆芥炒黑一錢、水煎服。一劑輕，二劑愈，不必三劑也。此方即十全大補之變方也。治氣血之虛者，實有相宜。茲何治陽虛而亦宜也。不知陽虛而陰未有不俱虛者，倘單補陽虛以助其陽，恐陽旺陰衰，轉動其火，不若兼補其陰，則陰足以制陽，陰陽相濟，而彼此氣通，蟬鳴之聲頓除也。

此症可用
開閉丹

黃芪一兩、當歸五錢、肉桂甘草各五分、菖蒲遠志柴胡香附各一錢、天花粉二錢、水煎服。二劑愈。

人有雙耳聾閉，雷霆喧呼之聲，終不相聞，而耳內不痛，此大病之後，或年老人有之，乃腎火內閉，而氣塞也。最難取效，法當內外兼治，內治必須大補心腎，雖耳屬腎，而非心氣之相通，則心腎不交，反致阻塞，故必用補腎之藥，使腎之液滋於心，即宜用補心之劑，使心之氣降於腎，心腎之氣既交，自然上升而通於耳。

矣。方用啓竅湯：熟地二兩、山茱萸一兩、麥冬一兩、遠志三錢、五味子二錢、石菖蒲一錢、炒棗仁三錢、茯神三錢、栝子仁三錢、水煎服。一連四服，而耳中必然作響，此欲開聾之兆也。再照前方服十劑，而外用龍骨一分、雄鼠胆汁一枚、麝香一厘、冰片三厘，研絕細末為丸，分作三九，綿裹塞之，不可取出。一晝夜即通矣。神效之極，耳通後，仍用前湯，再服一月，後用大劑六味丸，以為善後之計，否則恐不能久聰也。

此症用通耳湯亦妙

熟地三兩、麥冬一兩、炒棗仁茯神玄參各五錢、菖蒲一錢、栝子仁炒黑荆芥各三錢、水煎服。十劑自通。

人有平居無事，忽然耳聞風雨之聲，或如鼓角之響，人以為腎火之盛也，誰知是心火之亢極乎。凡人心腎兩交，始能上下清寧，以司視聽，腎不交心，與心不交腎，皆能使聽聞之亂，然而腎欲

上交於心與心欲下交於腎必彼此能受始慶相安倘腎火大旺則心畏腎炎而不敢下交心火過盛則腎畏心煩而不敢上交矣二者均能使兩耳之鳴但心不交腎耳鳴輕腎不交心耳鳴重今如聞風雨鼓角者鳴之重也治法欲腎氣復歸於心必須使心氣仍歸於腎方用兩歸湯麥冬一兩黃連二錢生棗仁五錢熟地一兩丹參三錢茯神三錢水煎服二劑而鳴止四劑不再發此方涼心之劑也心既清涼則腎不畏心熱而樂與來歸原不必兩相引而始合也况方中全是益心滋腎之品不特心無過燥之虞而且腎有滋潤之樂自不啻如夫婦同心有魚水之歡而無乖離之戚也又何至喧闐於一室哉

此症可用定喧湯
玄參三兩生地一兩貝母二錢水煎服一劑即止鳴

人有不交感而兩耳無恙一交接婦女耳中作痛或癢發不已或

流臭水以涼物投入則快甚人以為腎火之盛誰知是腎火之虛乎夫腎中之火乃龍雷之火也火旺則難動而易息火衰則易動而難息其故何哉蓋火旺者水旺也火衰者水衰也水衰則不能制火而火易動水衰則不能養火而火難息耳故補水必須補火補火而水乃生亦補火必須補水補水而火乃盛二者原兩相制而兩相成也腎開竅於耳腎之水虛則腎之火亦虛矣耳之癢痛作於交感之後正顯其腎中水火之虛也治法必須補腎中之火而火不可獨補必須於水中補之方用加減八味丸湯熟地一兩山茱萸五錢丹皮五錢澤瀉二錢茯苓三錢山藥五錢麥冬五錢北五味一錢肉桂二錢水煎服一劑而痛輕再劑而痛止三劑癢亦止四劑而水不出也十劑全愈此方補火而亦補水而補水多於補火者以火不可過旺也水旺

於火而火有安寧之樂，火引於水之中，水資於火之內，則火不至易動而難息，又何致上騰於耳門，作痛作癢而出水哉。

此症用補陰制

火湯亦妙

熟地二兩，山茱萸、芡實各一兩，肉桂一錢，水煎服，十劑全愈。

婦人有因怒發熱，經來之時，兩耳出膿，兩太陽作痛，乳房脹悶，寒熱往來，小便不利，臍下滿築，此是肝氣之逆，火盛血虧也。夫腎雖開竅於耳，耳病宜責之腎，然而肝為腎之子，腎氣既通於耳，則肝之氣未嘗不可相通者，子隨母之象也。况肝藏血，怒則血不能藏矣。經來之時，宜血隨經而下行，不宜藏於經絡，而作痛滿脹悶也。不知肝喜疏泄，怒則氣逆而上奔，氣既上逆，而血又何肯順行於下，而為經乎？勢必散走於經絡，而不得泄，則火隨鬱勃之氣而上冲兩耳之間，乃化為膿水，而流出於腎母之竅矣。太陽者膀胱之位也，腎與膀胱為表裏，肝走腎之竅，獨不可走膀胱之路乎？小便不利，正肝氣之乘膀胱也。腎之氣通於腰臍，臍下滿築者，正肝氣之乘腎也。至於乳房脹悶，尤肝逆之明驗，以兩脇屬肝之部位，而乳房乃兩脇之際也。治法宜舒肝氣，而使之順，不必治耳，而耳自愈也。方用加味逍遙散，白芍一兩，柴胡二錢，當歸一兩，甘草一錢，陳皮一錢，茯神三錢，白朮五錢，炒梔子一錢，天花粉二錢，枳殼五分，丹皮三錢，水煎服，二劑而諸症皆痊。此方乃平肝之聖藥，亦解怒之神劑也。補血而又無阻滯之憂，退火而更鮮寒涼之懼，不必治腎，而治腎已包於其中，不必通膀胱，而通膀胱已統乎其內，變通之法，何往往棄之而不用耶。

此症用莫愁湯亦神

此症用莫愁湯亦神

白芍生地各五錢當歸一兩炒梔子天花粉香附各二錢甘草蒼朮各一錢炒荆芥三錢枳壳五分水煎服一劑輕二劑愈

[Faint bleed-through text from the reverse side of the page]

目痛門

人有目痛如刺觸兩角多眵蓋明畏日兩泡浮腫淚溼不已此肝木風火作祟而脾胃之氣不能升騰故耳人生後天以脾胃為主脾胃一受肝木之制則土氣遏抑津液乾涸於是木無所養而乾枯風又襲之則木更加燥眼目肝之竅也肝中無非風火之氣而日欲清涼得乎惟是肝經既燥而目偏生淚何哉蓋腎氣救之耳肝為腎之子肝子為風火之邪所困燃眉之禍必求救於腎母而腎痛其子必以水濟之然而風火未除所濟之水與風火相戰腎欲養木而不能肝欲得水而不敢於是目不得水之益而反得水之損矣然而水終為木之所喜而火終為木之所畏日為陽火燈為陰火故兩忌之治法自當以祛風滅火為先然而徒治風火而不用和解之法則風不易散而火不易

息也方用息氛湯柴胡二錢當歸三錢白芍三錢天花粉二錢
 白蒺藜三錢蔓荊子一錢甘菊花三錢草決明一錢炒梔子三
 錢白茯苓三錢水煎服二劑而火退再服二劑而羞明畏日之
 症除再服二劑諸症盡愈也此方瀉肝木之風火而又善調脾
 胃之氣更佐之治目退翳之品真和解得宜也

此症柴荆
 飲亦妙

柴胡薄荷荊芥甘菊各一錢甘草三分茯苓三錢白芍四錢
 白蒺藜草決明炒梔子各二錢密蒙花半夏各五分水煎服
 四劑

人有目痛既久終年累歲而紅赤不除致生努肉扳睛拳毛倒睫
 者乃悞治之故也大凡目疾初痛則為邪盛目疾久痛則為正
 虛正虛而悞以邪盛之法治之則變為此症矣世人不悟動以
 外治不知內病未痊而用外治之劫藥鮮不受其害者我今特

傳一方凡有努肉扳睛拳毛倒睫者服之無不漸愈但不能取
 效神速也蓋眼既經悞治而成斯病其由來者非一日用藥何
 能責其近功乎方名磨翳丹葳蕤一觔甘菊花一觔當歸一觔
 白芍一觔陳皮二兩柴胡三兩同州蒺藜一觔白芥子四兩茯
 神半觔各為末蜜為丸每日早晚白滾水送下各五錢服一料
 全愈此方用攻於補之中不治風而風息不治火而火亡不治
 努肉而努肉自消不去拳毛而拳毛自去萬勿視為平平無奇
 而不知奇寓於平之中也

此症用加減道
 遙散亦佳

白芍當歸各一兩甘草白蒺藜葳蕤仁各一錢陳皮五分
 茯苓三錢甘菊三錢柴胡半夏各三分水煎服三月愈

人有目痛後迎風流淚至夜則目暗不明一見燈光兩目乾澀此
 乃少年時斲喪元陽又加時眼不守色戒以致傷損大眚故皆

孔不閉風寒透入其孔內氣既虛外邪難杜故爾出淚也夫淚生於心大皆正心之竅也傷心則淚出傷大皆而亦淚出者正見內外之關切傷大皆即傷心也然則欲止大皆之淚安可不急補其心乎而徒補心亦正無益必須兼腎與肝而治之使腎水生肝木而肝木更能補心也方用固根湯葳蕤一兩當歸五錢白芍五錢熟地一兩麥冬五錢甘菊三錢菖蒲三分柴胡五分水煎服連服四劑即不畏風再服四劑見風不流淚矣再服十劑全愈葢葳蕤最善止淚加之當歸白芍以補肝熟地以滋腎益之麥冬以補心佐之甘菊菖蒲柴胡以舒其風火而引諸經之藥以塞其淚竅此固其根本而末症自愈也

此症用養目

湯亦效

當歸熟地葳蕤白芍各五錢山黃茯苓麥冬白朮丹皮
枸杞各三錢巴戟天二錢柴胡三分水煎服十劑全愈

人有患時眼之後其目不痛而色淡紅然羞明惡日與日痛時無異此乃內傷之目人誤作實火治之又加不慎色慾故爾如此若再作風火治之必有失明之悲必須大補肝腎使水旺以生肝木旺以祛風則目得液以相養而虛火盡散也方用養目湯熟地一兩白芍五錢麥冬五錢當歸一兩葳蕤五錢山茱萸四錢北五味一錢甘草一錢甘菊花二錢柴胡五分水煎服二劑而目明又二劑而羞明之症痊更四劑而紅色盡除而愈矣此方大補腎肝全不去治目正所以治目也世醫每拘執成方不顧目之虛實一味以治火為主者不知壞天下之眼幾百萬矣幸治目者察其虛實如知其虛即以此方投之效應如响正不必分前後也然初起即是內傷之目痛又從何處辨之日間痛重者陽火也乃是實症夜間痛重者陰火也乃是虛症虛症即

用此方急治之隨手建功何至變生不測哉

此症用還光

飲亦妙

熟地一兩山茱萸四錢枸杞甘菊同州蒺藜玄參麥冬各三錢葳蕤五錢肉桂三分水煎服十劑全愈

人有陰火上冲兩目紅腫淚出而不熱羞明而不甚日出而痛輕日入而痛重此非虛症之痛乎然不在肝而在腎也腎中無火下焦寒甚乃逼其火而上行浮遊於目而目痛也治法不可瀉火而宜補火并不可僅補火而兼宜補水腎中真寒而火不存實腎中少水而火無養也水火原不可兩離補水即宜補火則水不寒補火即宜補水則火不燥治陰虛火動之症者無不當兼治何獨於治目者殊之方用八味地黃湯加減熟地一兩山茱萸五錢山藥五錢茯苓澤瀉丹皮各三錢柴胡五分白芍五錢甘菊花三錢肉桂一錢水煎服一劑而陰火歸源目疾頓愈

抑何其治法之神乎蓋陰陽之道歸根最速吾用六味大滋其腎中之水加肉桂以溫其命門之火火喜水養即隨水而同歸於本宮龍雷安靜而雲漢之間火光自散有不返為青天白日之世界乎况佐之柴芍甘菊風以吹之通大澤之氣而雷火更且安然也

此症用抑火散亦效

熟地麥冬各一兩北五味肉桂各一錢巴戟天葳蕤各五錢水煎服一劑效二劑全愈

人有能近視而不能遠視者近視則蠅脚細字辨晰秋毫遠視則咫尺之外不辨真假人以爲肝血之不足誰知是腎火之本微乎腎火者先天之火也是火存於腎水之中近視之人既非水之不足何致火之無餘不知先天之火天與之也生來火微光焰自短蓋眼目之中不特神水涵之抑亦神火藏之故凡光能

照遠者火也近視之人正神火之微耳神火藏於目中而發於腎內治近視之病必補腎火為主然而火非水不養雖近視之人原有腎水然能保其後天之不斷削乎水中補火不易之道也方用養火助明湯熟地五錢山茱萸三錢葳蕤五錢巴戟天一兩肉桂一錢麥冬三錢北五味子三分枸杞三錢水煎服一月之後自然漸能遠視矣仍將前藥修合丸散日日吞服一年之後遠近俱能視也但服藥之時必須堅忍色慾為妙否則僅得半之道耳此方補命門之火所以助其陽也雖助陽無非益陰本無他害誠恐不善受益者借陽以作樂故戒之如此

此症用鑿遠湯亦佳

附子北五味各一錢熟地葳蕤各一兩山茱萸五錢水煎服

人有目痛二瞳子大於黃精視物無準以小為大人以為內熱之

故也誰知是氣血之虛而驟用熱物火酒以成之者乎夫五臟六腑之精皆上注於目而瞳子尤精之所注也故精足則瞳子明精虧則瞳子暗視物而眵大小者蓋筋骨氣血之精而為脉并為系上屬於腦腦熱則瞳子散大而腦之所以熱者由於多食辛熱之物也火酒者酒中至熱之漿且其氣又主散腦中之精最惡散而最易散熱而加散腦氣又烏能安然無恙乎自必隨熱而隨散矣腦氣既熱則難於清涼更難於靜固欲瞳子之不散大而不可得又烏能視物有準哉治法以解熱益氣為主而解熱必須滋陰滋陰自易降火然後於滋降之中佐之酸收之味始克斂瞳神之散大也方用斂瞳丹熟地一兩山茱萸五錢白芍一兩當歸伍錢黃連三錢五味子一錢人參三錢甘草一錢地骨皮五錢柴胡五分柞木枝三錢陳皮五分黃栢五分

水煎服連服四劑瞳子漸小再服四劑而視物有準矣服一月全愈此方涼血於補血之中瀉邪於助正之內祛酒熱於無形收散精於不覺實有不知其然而然之妙較東垣治法為更神也

此症用束睛丹亦效

熟地白芍麥冬各一兩人參五錢炒梔子川芎各三錢北五味一錢水煎服十劑全愈

人有病目數日而即生翳由下而上其翳色作澹綠狀瞳子痛不可當人以爲肝木之風誰知是腎火乘肺肺火與腎水相合而不解乎夫腎主黑色肺主白色白與黑相合必變綠色也惟是腎爲肺子肺爲腎母二火何以相犯乃子母之變耳弟子母相犯者無關輕重其翳由下而上是子犯其母亦緣母之過柔也天下安有母旺而子敢犯者乎是治之之法補母而子之逆可

安矣雖然子之天性凶逆亦從旁之人必有導之始敢安於逆而不顧腎火之犯肺者亦經絡之多不調也補肺金以抑腎烏可不調其經絡以孤腎火之黨乎方用健母丹麥冬天冬各一兩生甘草黃芩各一錢茯苓青蒿白芍桔梗丹參各三錢陳皮三分天花粉二錢水煎服一劑而綠色退四劑而目翳散十劑全愈此方用二冬以補肺用甘草桔梗以散肺之邪用黃芩以退肺之火則肺氣既旺而腎火自然難侵况益之茯苓以瀉膀胱之火用青蒿以瀉胃脾之熱白芍以平肝膽之氣丹參以清心內之炎是臟腑無非清涼而腎臟邪火安能作祟譬如一家之中叔伯兄弟盡是正人君子羣來解勸而忤逆之兒即不愧悔自艾斷不能增添其橫而爲犯上之亂矣

此症用益肺湯亦效

麥冬二兩、天門冬五錢、生地、玄參各一兩、水煎服、十劑愈。

人有兩目無恙、而視物皆倒植、人以為肝氣之逆、誰知是肝葉之倒置乎、夫目之系通於肝、而肝之神注於目、肝斜則視斜、肝正則視正、肝直則視直、肝曲則視曲、肝岐則視岐、此理之常也、今視物倒植者、乃肝葉倒而不順耳、此必因吐而得者、蓋吐則五臟反覆、而肝葉開張、壅塞於上焦、不能一時迅轉、故肝葉倒、而視物亦倒也、治法宜再使之吐、然而一吐已傷五臟、再吐不重傷五臟之氣血乎、但不吐而肝葉不易遽轉、吾於吐中、而仍用和法、方用安臟湯、參蘆鞭二兩、瓜蒂七箇、甘草一兩、荆芥三錢、水煎三大碗、頓服之、即用鷺翎掃喉中、必大吐、吐後而肝葉必順矣、瓜蒂散原是吐藥、余加參蘆鞭甘草荆芥者、於補中、以行其吐、即於吐中、以安其經絡、何至五臟反覆、以重傷其氣血哉。

此乃吐之變法也、凡虛人而宜用吐法者、皆可照此法治之、

此症用參蘆湯吐之亦妙

人參蘆四兩、煎湯數碗、盡服之、以鷺翎掃喉引吐、吐後即愈

人有驚悸之後、目張不能瞑、百計使之合眼、不可得、人以為心氣之弱、誰知是肝膽之氣結乎、雖五臟六腑、皆稟受脾土、土貫於目、而目之系、實內連肝膽也、肝膽血足而氣舒、肝膽血虧而氣結、然此猶平居無事之謂也、肝膽逢驚則血縮、肝膽逢悸則血止、血止血縮、而氣乃因之而結矣、氣結則肝膽之系、不能上通於目、而目之睫不能下矣、治法必須解其氣結、然而不易解也、仍當補其肝膽之血、血旺則氣伸、而結乃解也、方用解結舒氣湯、白芍一兩、當歸一兩、炒棗仁一兩、郁李仁三錢、水煎服、一劑而目能瞑矣、白芍平肝膽之旺、於瀉中能補、當歸滋肝膽之枯、

於補中能散炒棗仁安心之藥心安則不必取資於肝膽子安而母更安也郁李仁善能去肝膽之結入之於三味之中尤易入肝而舒滯去鬱也所以一劑奏功耳

此症用舒結湯亦神

柴胡荆芥各二錢白芍一兩甘草半夏獨活各一錢炒棗仁四錢麥冬五錢水煎服一劑目瞑而卧

人有無故忽視物為兩人以為肝氣之有餘誰知是腦氣之不足乎蓋目之系下通於肝而上實屬於腦腦氣不足則肝之氣應之肝氣大虛不能應腦於是各分其氣以應物因之見一為兩矣孫真人曰邪中於頭因逢身之虛其入深則隨目系入於腦入於腦則轉轉則目系急急則目眩以轉邪中於睛所中者不相比則睛散睛散則岐故見兩物此言尚非定論治法必須大補其肝氣使肝足以應腦則肝氣足而腦氣亦足也方用助肝

益腦湯白芍二兩當歸一兩人參三錢郁李仁二錢柴胡五分天花粉二錢細辛五分川芎三錢甘菊花五錢薄荷八分生地五錢天門冬三錢甘草一錢白芷三分水煎服一劑而視物為一矣二劑全愈此方全是益肝之藥非益腦之品也不知補腦必須添精而添精必須滋腎然而滋腎以補腦而肝之氣不能遽補不若直補其肝而佐之祛邪之藥為當蓋腦氣不足而邪得以居之不祛邪而單補其精於腦氣正無益也治肝正所以益腦也

此症亦可用補瞳神丹

當歸白芍各一兩郁李仁黑荆芥丹皮各三錢麥冬川芎葳蕤各五錢細辛五分水煎服二劑愈

人有病目之後眼前常見禽鳥昆蟲之飛走捉之則無人以為怪而不知非怪也乃肝膽血虛有痰而閉結之也夫肝膽屬木木

中無血以潤之則木氣過燥矣內燥必取給於外水然而肝膽喜內水之資而不喜外水之養於是外水不變血而變痰血資肝膽則有益痰侵肝膽則有損且血能入於肝膽之中痰難入於肝膽之內痰既在外反壅塞肝膽之竅而氣不能展矣見禽鳥昆蟲之飛走者皆痰之作祟也治法益肝膽之血而兼消其外壅之痰方用四物湯加味治之熟地三錢白芍五錢當歸一兩川芎二錢酸棗仁五錢青箱子三錢茯神三錢陳皮一錢甘草一錢半夏三錢白朮二錢水煎服四劑目無所見矣此方用四物湯以滋肝膽用茯苓半夏白朮以分消其溼痰加入棗仁青箱子以青箱子走目中之系棗仁去心內之迷心氣清而痰易出目系明而邪自散也然但用二味而不合前藥同用正未能出奇制勝耳

此症用向榮湯亦妙

當歸白芍生地各一兩麥冬五錢白芥子茯苓各三錢貝母一錢柴胡五分水煎服十劑全愈

人有目痛之餘兩目白眚盡變為黑不痛不疼仍能視物無恙毛髮直如鐵條癡癡如醉不言不語人以為血債之症也誰知是腎邪之乘心乎夫心屬火腎屬水二經似乎相尅然而心火非腎水不能相養腎水不上交於心則心必有煩燥之憂但腎水僅可相資於心而不可過侮夫心也腎氣乘心本欲救心之枯而腎中倘有邪水亦挾之以資心則心受傷矣心受腎邪本自死症乃不死而但現黑色於目者以腎來救心而非犯心也心畏腎邪而又不取彰彰腎之過白眚變黑赤白難分毛髮直豎非怒極之驗乎癡癡如醉不言不語非挾制太甚無可如何之象乎治法宜斬關直入急救心君之垂危祛蕩腎邪撥亂反正

之為得也。方用轉治湯：茯苓五錢、人參五錢、附子二錢、五靈脂末二錢、菖蒲一錢、白芥子三錢、白朮五錢、良薑一錢。水煎服。一劑而癡醉醒，二劑而毛髮軟，三劑而黑皆解，四劑全愈。夫腎中之邪，不過寒溼之氣，用辛燥溫熱之劑，自易祛邪。况佐之奪門之將，輔之引路之人，有不恢復於須臾，定亂於頃刻哉。

此症用利水益

心丹亦佳

茯苓、人參、薏仁、巴戟、天各五錢、白芥子、肉桂各三錢、白朮一兩。水煎服，四劑全愈。

人有月經不通三月，忽然眼目紅腫，疼痛如刺，人以為血虛而不能養目也。誰知是血壅而目痛乎？夫經水不通，似乎血枯之症，然而血過於盛，則肝氣反閉塞而不通。經既不通，則熱無可洩，不下行而轉壅於上，而肝之竅開於目，乃走肝而目痛矣。此等之痛，肝脉必大而有力，或弦而滑，必非細濇微緩無力之狀也。

治法不可補血以助熱，宜通經以瀉肝。方用開壅湯：紅花三錢、當歸尾三錢、牛膝二錢、桃仁十四箇、柴胡二錢、丹皮三錢、大黃一錢、香附一錢、鬱金三錢、天花粉二錢、玄胡索一錢。水煎服。一劑而經通，再劑而目愈。此方全不治目，但去通經，經通而熱散，熱散而目安也。

此症可用瀉壅丹

當歸一兩、紅花五錢、大黃二錢、生地五錢、荆芥三錢、桃仁十粒、丹皮三錢、炒梔子二錢。水煎服。一劑而血通，二劑而目之腫全消，不必三劑也。

人有一時狂吐血者未有不本之火者也然血已吐出如傾盆則
 火必變為虛火矣實火可瀉而虛火斷不可瀉况血已吐出無
 血養身而又用瀉火之藥以重傷其胃氣母論血不能驟生而
 氣亦不能遽轉往往有至氣脫而死者治法不可止血而當活
 血尤不可活血而急當固氣蓋氣固則已失之血可以漸生未
 失之血可以再旺耳方用固氣生血湯黃芪一兩當歸五錢荆
 芥炒黑二錢水煎服一劑血止再劑氣旺四劑血各歸經不致
 再吐矣此方即補血湯之變全在荆芥引血歸於氣分之中引
 氣生於血分之內氣血之陰陽既交則水火之陰陽自濟斷不
 至臟腑經絡再有拂逆使血沖擊而再嘔也蓋有形之血不能
 速生無形之氣所宜急固吐血不治血而治氣前人已有言之

血症門

人有一時狂吐血者未有不本之火者也然血已吐出如傾盆則
 火必變為虛火矣實火可瀉而虛火斷不可瀉况血已吐出無
 血養身而又用瀉火之藥以重傷其胃氣母論血不能驟生而
 氣亦不能遽轉往往有至氣脫而死者治法不可止血而當活
 血尤不可活血而急當固氣蓋氣固則已失之血可以漸生未
 失之血可以再旺耳方用固氣生血湯黃芪一兩當歸五錢荆
 芥炒黑二錢水煎服一劑血止再劑氣旺四劑血各歸經不致
 再吐矣此方即補血湯之變全在荆芥引血歸於氣分之中引
 氣生於血分之內氣血之陰陽既交則水火之陰陽自濟斷不
 至臟腑經絡再有拂逆使血沖擊而再嘔也蓋有形之血不能
 速生無形之氣所宜急固吐血不治血而治氣前人已有言之

辨證錄 卷之三
者，余不必再論也。大約此方治初起嘔狂血者，若吐血既久尚宜斟酌。

此症用黃荆湯亦神
生地四兩，炒黑荆芥三錢，煎服即止。

人有久吐血而未止，或半月一吐，或一月一吐，或三月數吐，或終年頻吐，雖未咳嗽，而吐痰不已，委困殊甚。此腎肝之吐也。夫吐血未必皆是腎肝之病，然吐血而多經歲月，未有不傷腎肝者。腎肝既傷，則水不能養肝，而肝木必燥，龍雷之火不能安於木中，必下剋於脾胃，而脾胃寒虛，龍雷之火乃逆冲於上，以欺肺金之弱，挾胃中之血，遂火旺而沸騰，隨口而出矣。治法必腎肝肺三經統補之，方用三台救命湯：熟地半觔，麥冬三兩，丹皮二兩，水煎三碗，一日服盡，不再吐。熟地補腎以滋肝，麥冬清肺以制肝，丹皮去肝中浮遊之火，又能引上焦之火，以下歸於腎臟。

使血歸經也。然非大用之，則火勢燎原，何能止抑其炎炎之勢？故必用重劑，則滂沱大雨，而遍野炎氛始能熄燭。至於火息血靜，用地黃丸調理三年，乃延生之善計。願人守服以當續命膏也。

此症用填精止
血湯甚佳。

熟地二兩，山茱萸四錢，麥冬五錢，北五味子一錢，炒黑荆芥三錢，白芍一兩，水煎服，十劑血不再吐。

人有吐黑血者，雖不至於傾盆，而痰嗽必甚，口渴思飲。此腎經之實火也。蓋腎中之火又挾心包，相火並起而上冲耳。然而心包之火可瀉，而腎火終不可瀉。瀉心包之火，必致有傷於腎。吾乃瀉其肝，則二經之火不瀉而自瀉也。肝為心包之母，而腎之子也。母弱而子不能強，子虛而母亦自弱耳。方用兩瀉湯：白芍一兩，丹皮一兩，地骨皮一兩，炒黑梔子三錢，玄參一兩，水煎服。連

服二劑而黑血變為紅色矣再服二劑而咳嗽除血自止神效也夫黑乃北方之色也黑血宜屬腎而乃兼屬之心火者亦猶火熱之極投於水中則化為烏薪心包之火同入於腎中則火極似水又何疑乎今用兩瀉之湯雖瀉肝木其實仍是兩瀉心包與腎經也火得水而解血得寒而化此黑血之所以易變而吐血之所以易止也

此症亦可用三仙散火湯
玄參三兩生地二兩白芍一兩水煎服二劑即止血

人有感觸暑氣一時氣不得轉狂嘔血塊而不止者此暑邪犯胃也其症必頭痛如破汗出如雨口必大渴發狂亂叫若作虛症治之必反增劇如當歸補血湯又不可輕用也法宜消暑熱之氣而佐之下降歸經之藥則氣不逆而血自止矣方用青蒿一兩當歸五錢荆芥炒黑三錢石膏一兩麥冬五錢玄參五錢大

黃一錢水煎服一劑而暑氣消口渴止二劑而血歸於經諸症悉愈不可再用三劑也此方名為解暑止血湯青蒿能於解暑之中善退陰火則陰陽既濟而拂抑之氣自除於是以石膏退胃火麥冬退肺火玄參退腎火荆芥從上焦而引火下行又得大黃迅逐不再停於胃又恐血既上越大腸必然燥結加入當歸之滑以助其速行之勢故旋轉如環而取效甚捷也

此症亦可用散暑止血湯甚神
大黃生地石膏各三錢

人有痰中吐血如血絲者日間則少夜間則多咳嗽不已多不能眠此乃腎中之火冲入咽喉而火不得下歸於命門故火沸為痰而上升而心火又欺肺金之弱復來相刑是水之中兼有火之氣所以痰中見血絲也方用化絲湯熟地一兩麥冬五錢貝母一錢玄參五錢茯苓三錢蘇子一錢地骨皮三錢沙參三錢

荆芥炒黑一錢水煎服一劑而血絲少再劑而血絲斷矣此方肺腎心三經並治加之去痰退火之劑消弭於無形故能成功之速倘不用補劑而唯事於去痰退火吾恐痰愈多而血愈結也惟是既愈之後不可仍服此方宜服益陰地黄丸方用熟地一觔山藥八兩麥冬十兩北五味三兩山茱萸八兩丹皮六兩茯苓六兩地骨皮十兩澤瀉四兩蜜為丸服一年永不再發

此症用還源

湯亦佳

大熟地一兩山茱萸五錢炒黑荆芥三錢地骨皮五錢麥冬二錢天門冬二錢甘草貝母各三分桔梗五分木煎服三十劑愈

人有久吐血百計止之而不效者蓋血犯濁道也夫火不盛與氣不逆則血俱不吐當知氣逆由於火盛欲治氣逆必須降火然而火盛既久則火不能盛氣逆既久則氣更加逆似乎瀉火易

而降氣難不知火瀉則氣亦隨之而降矣但火久則變為虛火虛火宜引而引火之藥多是辛熱之味恐反有助逆之慮不若壯水以鎮陽火之為得也方用壯水湯熟地二兩生地一兩荆芥炒黑二錢三七根末三錢水煎調服一劑而血即止再劑而血即斷不再發也熟地與生地同用補精之中即寓止血之妙荆芥引血而歸於經絡三七根即隨之而斷其路徑使其入而不再出也火得水而消氣得水而降此中自有至理也

此症單用三七根末三錢加入童便一碗調服即止

人有大怒吐血色紫氣逆兩脇脹滿作痛此怒氣傷血不能藏而吐也肝本藏血逢怒則肝葉開張血即不能藏矣肝氣本急怒則更急急則血自難留故一湧而出往往有傾盆而吐者况肝中原有龍雷之火因怒而擊動其火於是劈木焚林而血乃上

越矣血既上湧肝無血養自然兩脇作痛輕則脹滿矣治法急宜平其肝氣而少加清涼之品則怒氣一平而龍雷之火自收血症可愈倘一味用止血之藥反足以拂其火熱之性也方用平肝止血散白芍二兩當歸一兩荆芥炒黑三錢炒梔子二錢甘草一錢丹皮二錢水煎服一劑而肝氣平二劑而吐血止三劑氣不逆而脹痛盡除也芍藥平肝而又能益肝中之氣血同當歸用之則生血活血實有神功丹皮梔子不過少涼其血以清其火以便荆芥之引經甘草之緩急也

此症用斷紅飲亦神效

白芍當歸各一兩荆芥炒黑三錢三七根末三錢水煎調服一劑即止血

人有咯血者血不驟出必先咳嗽不已覺喉下氣不能止必咯出其血而後快人以為肺氣之逆也誰知是腎氣之逆乎腎氣者

腎中之虛火也虛火之盛由於真水之衰不能制火致火逆冲而上血遂宜大吐矣又何必咳而後出蓋肺氣阻之也夫肺為腎之母腎水者肺之順子腎火者肺之驕子也肺本生腎水而不生腎火惡驕子之凌犯也其驕子因肺母之偏於腎水乃上犯劫奪肺金之血而肺又不肯遽予故兩相掙掣而咯血也方用六味地黃湯熟地一兩山茱萸三錢山藥三錢麥冬一兩五味子一錢茯苓澤瀉丹皮各二錢水煎服連服四劑血必不咯矣服一月全愈用六味湯以大資其腎水用麥冬五味以大益其肺金自足以制火之有餘何至於血之再咯而出哉此治水所以不須瀉火也

此症用生熟二地湯亦妙
生地熟地各二兩水煎服十劑即愈

人有嗽血者因咳嗽而出血也其症多因勞傷而成耗損腎水水

不能分給於各臟，而又不慎於女色，則水益涸矣。水涸而肺金必來相生，以洩肺金之氣，而無如腎水日日之取給也。則子貧而母亦貧矣。夫貧子盜母之資，則母有剝膚之痛，欲求救於胃，而胃又受肝火之凌，則胃不敢生肺，肝木生火，則心火必旺，心火一旺，必來乘肺，肺受外侮，必呼子以相援，而腎子水衰，不能制火，火欺水之無用，凌肺愈甚，肺欲避之，子宮而腎子之家，又窘迫乾枯，無藏身之地，勢不得不仍返於本宮，而咳嗽吐血矣。治法自宜救肺，然而徒救肺，而腎之涸如故，則肺之液仍去，顧腎而肺仍傷也。故治肺仍須補腎，腎水足而肝木平，心火息，不必治肺而肺已安矣。方用救涸湯：麥冬二兩，熟地二兩，地骨皮一兩，丹皮一兩，白芥子三錢，水煎服。一劑而嗽輕，二劑而咳輕，連服十劑，咳嗽除而血亦自愈。麥冬與熟地同用，乃肺腎兩治。

之法也。加入地骨丹皮者，實有微義。蓋嗽血必損其陰，陰虛則火旺，然此火旺者，仍是陰火，而非陽火也。我用地骨丹皮以解骨髓中之內熱，則腎中無煎熬之苦，自然不索於肺金，而肺中滋潤，自然清肅之氣，下濟於腎內，子母相安，則腎水漸濡，可以養肝木，可以制心火，外侮不侵，家庭樂豫，何至有損耗之失哉。至於白芥子，不過消膜膈之痰，無他深意，以陰虛咳嗽者，吐必有痰，故取其不耗真陰之氣也。

此症用麥冬、熟地湯亦佳。熟地二兩，麥冬一兩，水煎服，十劑全愈。

人有鼻中流血，經年經月而不止者，或愈或不愈。此雖較日中吐血者少輕，然而聽其流血而不治，與治不得其法，皆能殺人。蓋吐血犯胃，衄血犯肺，胃為濁道，肺為清道也。犯濁道則五臟盡皆反覆，犯清道則止肺經一臟之逆也。氣逆則變症多端，故皆

能殺人治法宜調其肺氣之逆但肺逆成於肺經之火夫肺屬金本無火也肺經之火仍是腎水之火肺因心火之侵腎水救母而致乾涸以腎火來助乃火與火鬪而血遂妄行從鼻而上越矣然則調氣之法舍調腎無他法也而調腎在於補水以制火方用止衄湯生地一兩麥冬三兩玄參二兩水煎服一服即止麥冬直治其肺金之匱乏生地玄參以解其腎中遏抑之火火退而氣自順血自歸經矣倘畏此方之重而減輕則火勢炎炎未易止遏不能取效也

此症用麥冬三七湯亦神
麥冬三兩三七根末三錢水煎調服二劑即止

人有耳中出血者涓涓不絕流三日不止而人死矣此病世不嘗有然而實有其症也耳者腎之竅也耳中流血自是腎虛之病然而腎虛血不走胃不從口出而偏從耳出者正有其故蓋心

包火引之也心包之火與命門之火原自相通二火沸騰則血不走胃而走耳矣蓋胃為心包之子胃恐腎火之害心而菁害胃故引其火而上走於耳諸經所過之地盡捲土而行故血乃隨之而出也雖耳竅甚細不比胃口之大無冲决之虞而涓涓不絕豈能久乎故必須急止之方用填竅止氛湯麥冬一兩熟地二兩菖蒲一錢水煎服一劑而效如响用熟地以填補腎經之水麥冬以息心包之焰二經之火息而耳竅不閉則有孔可鑽雖暫止血未必不仍然越出也故用菖蒲引二味直透於耳中又引耳中之火而仍返於心包火歸而耳之竅閉矣如此用藥之神真有不可思議之妙

此症用截流湯亦神效

熟地二兩生地麥冬各一兩三七根末三錢菖蒲一錢水煎服一劑即止血

人有舌上出血不止者，舌必紅爛，其裂紋之中，有紅痕發現，血從痕中流出，雖不能一時殺人，然而日加頓困，久亦不可救援也。此症乃心火太炎，而腎中之水不來相濟，夫心必得水以相養，邪水犯心則死，真水養心則生，故心腎似乎相尅，而其實相生也。今腎水不交於心，則欲求腎之養而不可得，乃借資於舌下之廉泉，終日取給其津液，未免舌爲之敝而乾涸矣。夫廉泉有水能灌注五臟，然而腎水足而廉泉之水亦足，腎水枯而廉泉之水亦枯，譬如江河之水旺而井水亦滿也，今腎水既不濟於心之中，何能越心而上升於唇口之上，此廉泉欲自養方寸之舌而不能，何能濟心之炎熱乎？故泉脉斷而井甃裂，亦無濟於心，而并爛其舌，舌既爛矣，清泉泥濘，必流紅水而成血也。治法必大補其心腎，使心腎交濟，而舌血不斷而自止也。方用護舌

丹、丹皮三錢、麥冬三錢、桔梗三錢、甘草一錢、玄參五錢、人參一錢、熟地一兩、五味子一錢、黃連三分、肉桂一分，水煎服，一劑而舌之血卽止，連服四劑，而舌之爛亦愈。此方全不治舌，而但交其心腎，心腎交而心之氣下通於腎，寧再求濟於舌乎？舌不耗津於心，則舌得自養，此不治舌，正勝於治舌，不止血而正勝於止血耳。

此症用清心救命丹亦神效

玄參麥冬各一兩，甘草一錢，菖蒲三分，茯神人參三七根末各三錢，五味子三粒，水煎調服，一劑卽止血。

人有齒縫出血者，其血之來如一線之標，此乃腎火之沸騰也。夫齒屬腎，腎熱而齒亦熱，腎虛而齒亦虛，腎欲出血而齒卽出血矣。雖然齒若堅固，則腎卽欲出血無隙可乘，似乎必須治齒，然而徒治齒無益，仍須治腎，蓋腎爲本而齒爲末也。夫腎火乃龍

雷之火，直奔於咽喉，血宜從口而出，何以入於齒耶？蓋腎火走任督之路，而上趨於唇齒，無可出之路，乘齒縫有隙而出之，龍雷之火，其性最急，而齒縫之隙細小，不足以暢其所出，故激而標出如線也。方用六味地黃湯，加麥冬五味骨碎補治之。熟地一兩，山藥四錢，山茱萸四錢，丹皮五錢，澤瀉三錢，茯苓三錢，麥冬五錢，五味子一錢，骨碎補一錢。水煎服一劑，而血即止也。連服四劑，永不再發。六味地黃湯，大補腎中之真水，水足而火自降，火降而血不妄行矣。又慮徒補腎水，而水不易生，用麥冬五味子，以補其肺，從腎之化源而補之也。補肺而水尤易生，加入骨碎補，透骨以補其漏，則血欲不止，而不可得矣。

此症亦可用

闔縫丹

猴薑人參北五味三七根未各一錢，甘草三分，各為細末，擦牙含漱，即止血，止後用六味丸，則不再發。

人有臍中流血者，其血不十分，多夾水流出，人亦不十分狼狽，然臍通氣海關元命門，烏可洩氣乎？雖流血非洩氣之比，而日日流血，則氣亦隨之而洩矣。治法自應閉塞臍門，然而不清其源，而徒閉其門，亦徒然也。夫臍之所以出血者，乃大小腸之火也。二火齊旺，必兩相爭鬪於腸中，小腸之火欲趨出於大腸，而大腸之火欲升騰於小腸，兩不相受，而火乃無依，上下皆不可洩，因臍有隙，乃直攻其隙而出，火出於臍，而血亦隨之矣。然則治臍之出血，可不急安其大小腸之火乎？然大小腸之所以動火，以腎經乾燥無水，以潤之也。故治大小腸之火，仍須以治腎為主。方用兩止湯，熟地三兩，山茱萸一兩，麥冬一兩，北五味五錢，白朮五錢，水煎服。一劑即止血，不流。四劑除根。熟地山茱以補腎水，麥冬五味以益肺氣，多用五味子者，不特生水，而又取其

酸而斂之也。加白朮以利腰臍，腰臍利則水火流通，自然大小腸各取給於腎水，而無相爭之亂。水足而火息，血不止而自止也。

此症用障臍湯亦甚神

大黃五分，當歸生地各一兩，地榆三錢，水煎服，一劑即止血。

人有九竅流血者，其症氣息奄奄欲臥，不欲見日，頭暈身困，人以爲崇憑之，不知此乃熱血妄行，散走於九竅也。視其症若重，然較狂血走一經者反輕，引血歸經，則血不再流矣。夫人一身之中，無非血也，九竅出血，乃由近而遠，非盡從臟腑而出，然而治法仍須治臟腑，而不可止治經絡，以臟腑能統攝經絡也。方用當歸補血湯，加味治之。當歸五錢，黃芪一兩，荆芥炒黑三錢，人參三錢，白朮五錢，生地五錢，水煎服，一劑即止血，二劑不再流。

矣。熱血妄行，不清火而反補其氣，因由於氣之虛也。氣虛則不能攝血，血得火而妄行，逢竅則鑽，今補其氣，則氣旺矣。氣旺自能攝血，倘用止抑之法，則一竅閉而衆竅安保，其盡閉乎。用補血湯，而又行氣涼血，未嘗無清火之味焉，得不奏功如神哉。

此症可用掩竅丹

人參當歸生地玄參各一兩，炒黑荆芥三錢，甘草一錢，水煎服，一劑即止血，二劑全愈。

人有大便出血者，或糞前而先便，或糞後而始來，人以爲糞前來者，屬大腸之火，糞後來者，屬小腸之火，其實皆大腸之火也。夫腸中本無血也，因大腸多火，燥乾腸中之液，則腸薄而開裂，血得滲入，裂竅在上，則血來遲，裂竅在下，則血來速，非小腸之能出血也。小腸出血，則人且立死，蓋小腸無血，如有血，則心傷矣。心傷安能存活乎。故大便出血，統小腸論之，以辨症，則可謂大

便之血以糲後屬小腸則不可也是治便血之症宜先治大腸然而大腸之所以出血非大腸之故也腎主大小便腎水無濟於大腸故火旺而致便血也方用三地湯熟地一兩當歸一兩生地一兩地榆三錢木耳末五錢水煎調服一劑即止血二劑全愈精血雙補則腸中自潤既無乾燥之苦自無滲漏之患况地榆以涼之木耳以塞之有不取效之速者乎

此症用薺苳熟地湯亦神

熟地三兩地栗三兩搗汁同熟地煎湯服二劑即止血

人有小便溺血者其症痛澀馬口如刀割刺觸而難忍人以為小腸之血也而不知非也小腸出血則人立死安得痛楚而猶生乎因人不慎於酒色欲洩不洩受驚而成之者精本欲洩因驚而縮入則精已離宮不能仍反於腎中而小腸又因受驚不得

直洩其水則水積而火生於是熱極而煎熬將所留之精化血而出於小便之外其實乃腎經之精而非小便之血也治法宜解其小腸之火然而解火而不利其水則水壅而火仍不得出精血又何從而外洩哉方用水火兩通丹車前子三錢茯苓五錢木通一錢梔子三錢黃柏一錢當歸五錢白芍一兩扁蓄一錢生地一兩水煎服一劑而澀痛除二劑而溺血止三劑全愈不必用四劑也方中通利水火而又加平肝補血之藥者蓋血症最懼肝木尅脾胃則脾胃之氣不能升騰而氣乃下陷氣陷而血又何從而升散乎今平其肝則肝氣舒而脾胃之氣亦舒小腸之水火兩通敗精有不速去者乎

此症用通瀉

飲亦神

黃柏車前各三錢茯苓白木各五錢王不留行二錢肉桂三分黃連一錢水煎服二劑即止血

人有皮毛中出血者、或標出如一線、或滲出如一絲、或出於頭上、或出於身中、或出於兩脛之間、皆肺腎兩經之虧火、乘隙而外越也、此等之症、舍補腎水、無第二法、可救、然而補腎之功、緩必須急補其氣、氣旺則肺金自旺、而皮毛自固矣、方用肺腎兩益湯、熟地二兩、人參一兩、麥冬一兩、三七根末三錢、水煎服、一劑而血即止矣、再用六味地黃湯、加麥冬五味、調服一月、不再發、蓋熟地壯水、麥冬益金、金水相資、則肺腎之火自息、血自歸經、何至走入皮毛而外洩、况三七根原能止血乎、

此症用其歸斂血湯亦神效

黃芪玄參各一兩、當歸五錢、麥冬一兩、北五味一錢、蘇子二錢、三七根末三錢、水煎調服、一劑即止血

人有唾血不止者、然止唾一口、而不多唾、人以為所唾者不多、其病似輕、而不知實重、蓋此血出於脾、而不出於胃也、夫脾胃相

表裏者也、血犯胃、已傷中州之土、先天已虧矣、况更犯脾陰之後、天乎、胃主受、而脾主消、脾氣一傷、不能為胃化其津液、雖糟粕已變、但能化麤、而不能化精、以轉輸於五臟六腑之間、則臟腑皆困、是脾之唾血、更甚於胃之吐血矣、然而脾之所以唾血者、仍責之胃土之虛、不特胃土之虛、而尤責之腎水之衰也、蓋胃為腎之關門、腎衰則胃不為腎以司其開闔、而脾之血欲上唾、而胃無約束、任其越出於咽喉之上矣、故脾之唾血、雖脾火之沸騰、實腎胃一火之相助也、治法平脾之火、必須補脾之土、更須補腎水、以止胃之火也、方用滋脾飲、人參三分、茯苓二錢、玄參丹皮芡實茅根山藥各三錢、熟地一兩、沙參五錢、甘草五分、水煎服、一劑而唾血止、再劑全愈、此方輕於治脾、而重於補腎、誠探本之法也、倘止瀉脾火之有餘、必致損胃土之不足、胃

氣傷而脾氣更傷然後始去補腎則不能生腎水矣何能制脾火之旺哉毋論唾血難止吾恐胃關不閉而血且大吐矣此滋脾飲之所以妙耳

此症用同歸湯亦神效

白朮玄參各一兩熟地二兩北五味一錢荆芥炒黑三錢貝母五分水煎服一劑即止血

人有雙目流血甚至直射而出婦人則經閉不行男子則口乾唇燥人以為肝血之妄行也誰知是腎中火動乎夫腎中之火相火也若君火寧靜則相火不敢上越惟君火既衰而後心中少動於嗜慾則相火即挾君主之令以役使九竅而九竅尊君之命不敢不從聽其所使矣心之系通於目肝之竅開於目肝中有火亦相火也與腎中命門之相火心中包絡之相火正同類也同氣相助而沸騰不啻如小人結黨比附而不可解直走心

肝之竅系血不下行而上行矣治法似宜補心君之弱以制腎火之動然而心火既虛補心而心不易旺必須補腎以生心則心火不動而腎火亦靜耳方用助心丹麥冬一兩遠志二錢茯苓神三錢熟地一兩山茱萸五錢玄參五錢丹皮三錢芡實三錢蓮子心一錢當歸三錢柴胡三分水煎服一劑而血止二劑不再發此方心肝腎三經同治之藥也補腎以生肝即補腎以生心耳或疑腎中火動不宜重補其腎不知腎火之動乃腎水之衰也水衰故火動水旺不火靜乎况心火必得腎水之資而火乃旺也心火旺而腎火自平非漫然用之耳

此症用郁膏湯亦神效

熟地白芍各一兩山茱萸五錢柴胡五分荆芥炒黑三錢北五味十粒竹瀝一合同水煎服二劑愈

人有舌上出血不止細觀之有小孔標血此心火上升以尅肺金

也。夫鼻衄犯氣道也，舌中衄血，不過犯經絡之小者耳。然有血出於口者，犯胃而不犯心，血出於舌者，犯心而不犯胃，犯胃為腑，而犯心為臟，烏可謂經絡細小之病，而輕治之乎？治法內補其心中之液，而外填其舌竅之孔，則心火自寧，而舌血易止也。方用補液丹，人參三錢，生地三錢，麥冬五錢，丹參二錢，北五味子十粒，山藥三錢，當歸五錢，黃連一錢，玄參五錢，貝母一錢，水煎服。外用炒槐花三七根各等分，為末，摻之即愈。夫槐花三七本能止血，似不必借重於補液丹也。然而內不治本，而徒治其末，未必不隨止而隨出也。

此症用栝子安
心湯亦神效

人參 茯苓 神栝子 仁各三錢 遠志一錢 菖蒲三分 當歸 生地 各五錢 五味子 十粒 貝母 黃連 各五分 水煎服 二劑即止血

遍身骨痛門

人有一身上下，由背而至腰膝兩脛，無不作痛，飲食知味，然不能起牀，即起牀，席而痛不可耐，仍復睡臥，必須捶敲按摩，否則其痛走來走去，在骨節空隙之處，作楚而不可忍，人以為此症乃痛風也。然痛風之症，多感於風溼，而風溼之感，多入於骨，久風溼入於經絡，則易去，風溼入於骨髓，則難祛，以骨髓屬腎，腎可補而不可瀉，祛風溼則傷腎，腎傷則邪欺正弱，將深居久住，而不肯遽出矣。雖然，腎不可瀉，而胃與大腸未嘗不可瀉也。瀉胃與大腸之風溼，而腎之風溼自去，蓋胃為腎之關，而大腸為腎之戶也。方用並祛丹，黃芪一兩，白朮五錢，茯苓五錢，甘菊花三錢，炙甘草一錢，羌活五分，防風五分，水煎服。一劑而痛減，二劑而痛除，三劑而痛全愈矣。愈後用八味地黃丸調理，永無再犯。

辨證錄
卷之三
之患論理不治腎而治胃與大腸之風溼去風宜用乾葛也去濕宜用猪苓也有風有溼必化爲火去火亦宜用石膏知母也然邪在骨髓必須用氣分之劑提出在氣分使微寒之品與輕散之味以和解之則邪易於速化然後用補腎之藥補其腎中之水火真水足而邪水不敢再入真火足而邪火不能再侵也

此症亦可用芪木兩活湯

人參肉桂各三錢白朮黃芪各一兩茯苓五錢
甘州一錢羌活獨活各五分水煎服四劑愈

人有遍身疼痛至腰以下不痛者人亦以爲痛風也誰知乃火鬱於上中二焦不能散而成者也若作風溼治之全不能效然而僅治其火亦正徒然蓋火生於用則肝膽之氣不宣木必下尅脾胃之土而土氣不升則火亦難發以致氣血耗損不能灌注於經絡而作痛矣方用逍遙散加味治之柴胡二錢白芍五錢

當歸一兩甘草一錢炒梔子三錢陳皮一錢茯苓三錢白朮二錢羌活一錢水煎服一劑而痛如失矣逍遙散專解肝膽之鬱梔子尤善於解鬱中之火肝膽之火既盛則膽中之汁必乾肝中之血必燥多加當歸芍藥更於平肝平膽之內而濟之滋膽滋肝之味也血足而氣自流通復加羌活以疏經絡自然火散而痛除耳

此症用和肝消火散

柴胡梔子丹皮蒼朮天花粉各二錢白芍五錢茯苓生地各三錢甘草一錢陳皮五分川芎一錢水煎服四劑全愈

人有遍身生塊而痛者此雖是痛風然因溼氣不入臟腑而外走經絡皮膚以生此塊乃溼痰結成者也消痰於腸胃之內者易爲力而消痰於經絡皮膚者難爲功雖然經絡皮膚固難治而腸胃可易治也吾治其腸胃而經絡皮膚之痛塊自消方用消

○塊止痛丹、人參三錢、黃芪五錢、防風一錢、半夏三錢、羌活一錢、白朮三錢、桂枝五分、茯苓五錢、薏仁五錢、水煎服、二劑而痛輕、四劑而痛止、十劑而塊消、二十劑而塊盡消也。夫塊結不散、正氣虛也、氣虛則痰結、吾用人參、芪朮、以補其氣、而痰之勢衰矣。况益之茯苓、薏仁、以利溼、半夏、以消痰、防風、羌活、以去風、桂枝、以逐邪、則痰之黨羽既孤、而不能留其塊壘矣。倘徒治經絡、皮膚、反耗損腸胃之氣、而氣不能行於經絡、皮膚、則塊且益大、何以消之哉。

此症用防芪分

溼湯甚效

黃芪、白朮、茯苓、各五錢、薏仁五錢、防風、柴胡、天花粉、各一錢、桂枝三分、麻黃五分、水煎服、四劑愈。

人有遍身疼痛、殆不可忍、然有時止而不疼、人以爲風溼相搏、誰知是氣血虧損、凝滯而不通乎。夫風寒束於肌骨、雨濕入於肢

節、皆能作痛、然其痛必一定不遷、非時而痛、時而不痛也。惟氣血既虛、不能流行於肢節肌骨之中、每視盛衰、以分輕重、氣到之時、則痛輕、氣散之後、則痛重、血聚之時、則痛輕、血滯之時、則痛重也。倘認作風寒雨溼之邪、而用祛除掃蕩之藥、則氣血愈虛、而疼痛更甚。治法必大補其氣血、而佐以溫熱之味、則正旺而邪不敢侵、不必止痛、而痛自止也。方用忘痛湯、當歸一兩、黃芪二兩、肉桂二錢、延胡索一錢、天花粉三錢、秦艽一錢、水煎服。一劑必出大汗、聽其自乾、一服即愈、二服不再發、此方即補血湯之變方也。補血湯名爲補血、實氣血雙補之神劑、今益以肉桂之祛寒、延胡索之活血化氣、天花粉之消痰去溼、秦艽之散風、即有外邪、無不兼治、何痛之不愈乎。

此症用化凝湯亦妙

當歸五錢 黃芪一兩 肉桂五分 茯苓五錢 柴胡甘草 羌活 半夏 各一錢 水煎服 四劑愈

辨證錄卷之三終

辨證錄卷之三終

